



Editorial

“Keima ei ngaina chu ke’nle ka ngaina, gun chutak ah ei hawlte chun ei mu’n au” -Proverb 8:17

~By: Rev. Seilunlal Vaiphei

Tuni hun tiang ah “DAMNA AW” malam kalsuang to zel thei ah imau eipuitu Pathian lopina changta hen. Khawvel ah buai pum pum a khawsa leh masawn ding ah guat leh hiatsak a umte ihi ziakun i chan chung ah thuakdan thiam angai hi. Zia gual ma chun, khawvel ah um nalai ihi ziakun “tupna” nei akul dan tamlo chan ala gen khawm hitiu

Tupna:

Tupna iti phat leh mihing khat in ahinkhua ah aneilo ah thil khawk tak khat chu ahi. Zia tupna i nei hin i hinkhua zosia ah malam kalsuanna ding ah gunchuna, kitilkhona, dettaka pang ding leh malam ah lawtinna ding ah kalbi hoi tak ei siam piaktu ahi. Ziaziaakchun, Mihing khat chun zia tupna hi ngaineplo ah anei tei tei ding thil chu ahi.

Chun, tupna diktak nei ngal ah gentheina ka thuak pei puai ti thei mi chu zuau thei tina ahi. A thiltupna ziaakin abul lim in haksatna/gentheina tam tak leh mi dangte mu da nate chu ahung thuak tozel angai hi. Himaleh tu

hun ah gentheina leh musit ah a um nate chu khawnung leh alawtin saktu ah hung pang ding ahi. A thiltup chu ahiatchian ziaakin genthei/haksatna atuak ding le khawsalo in tawmngaina tawh malam asawn tun tun sek hi.

Tupna neilo:

Mihing khat chu tupna mumal neilo ah hinkhua mangte chu ganhing gual mai ahi. A chiana lam lam ah amu masakte enla kawm in lungawi takin ne’n hinkhua amang sek a. A nekwaw phat leh midangte kiang in nek leh dawn ding hawl in avak vel sek hi. Zia gual mite chung ahin lungthim chawldamna leh kipakna bukim um tak tak theilo ahi.

Chun, asepe abawl na lam zosia'n lawtina lam sang in mite muda leh sim maw nan hinkhua amang tam zaw sek ui. A thil ngaitua-na lam lam uh lawtinna sang in lawsapnan adelzui zaw ta sek hi. Zia phat chuleh alunggil un kipakna lam sang in thatda na hinkhua ahung mang ta sek ui. Thil amu leh achante chung in alungkim ngai pua, mi dangte mu leh chante itsik nan hinkhua amang zaw sek hi. A chan chung ah lung awi-lo ahi ziak in ma ban ah athil ngaitua nate leh ahinkhua bangmalo mai hung hisek ahi.

Gunchu taka hawl ding ahi:

Taksa lam i khawsakna ahin sem nuamlo in nek leh dawn kining ting taka a um ziang ding chu thil hitheilo ahi. Mi dangte sang ah nei nung ding gua mite chun tai ma takin sun leh zan in pan ala zing sek hi. A tupna zia kin genthei haksatna achung in sôm gual in sa takin ki nawk ziang maleh gunchu takin apang tun tun sek hi. Tuhin gentheina ka thuak hi kama'n lawtinnan ei ngak hi tin kinepna tawh malam akalsuan zel thei hi. Thil bangkim ibawl na taphawt ahin gunchu na nei apawi maw a, chun gunchu nalo in lawtinna mu ahak sai.

Gingtute hinle Pathian lung hawl na lam ah tupna kichian takinei ngamlo uh ahi chun amel mulo ding ihu. Thil dik leh diklo khawksalo ah eima inchen siamna ding ah golgukna inei teu hi nusia masak ding ahi. Lungthim thua nei zing kawm ah Pathian pak leh chawihawi ding kiti chu apawm tak hi kei lo ahi. Lei lam go lunggul mite a ding in kipakna bukim mu ahaksa. Himale Pathian lunglam hawlte vang chu thil bangkim piak belap ahi sek zawi. Ziakiakchun, gingtute hin lei lam hausakna leh nunnawpnate tup ah hinkhua mang sawt talo in, ei siamtu Pathian lunglam hawl leh anasep zawk tup thei din hinkhua imat ngai ahi.

--o0o--

Pathian Nasep:

-Rev. Siam Phaltual

Thumapui: Amasan hun pha ei petu Pathian lopina changta hen! Pathian Nasep ti i thupiu hin a tup leh daw i hi Jesu Khrista'n nunzuite kiang ah thu vaithak lopi tak mai a la piak, "...chiau inla, namtin lak ah mi nungzui in siam unla, Pa leh Chapa leh Thagau Thiangtho min in baptis un.." (Mtt.26:19) hi tawh kituak ma ma in ka hiai. I thupiu "Pathian Nasep" himaleh Pathian na sep a hitheina ding ah nasemtu bawl masak ding leh kisaklawk ding dan gen ding i hiu. Lampi chuam chuam ah gen thei himaleh a bailam thei pen ding in gen khawm leu hin ka nuam hi.

1. Kisingsakna:

Galdo ding him him chu a kisingsa sek un, govt. in sepai a neite haw saw le training hawi tak piak a hisek ui. Khawi tak mun in melmate tawh kidona um ziang leh le zo thei ngei ding in a kisingsakna a nei uh a hi. Zia gual ah chun, gingtute'n le Pathian na i sepna ding ah hin thagau lam ah galdo ngei ding i hiu ti hian, pha tak ah i kisingsak lawk uh hi a kul hi. Eima lam ah kisingsakna um- lopi'n melmate chu vazaw ziang thei ding in gingchak a um puai. Gingtute'n Pathian na i sepna diu ah hin le melma tuak ngei ding i hiu a, i zaw theina ding un kisingsakna/kiginglawkna i nei diu a hi. A nuai ah thu khenkhatte hi i

kisingsaknau hileh a daw i um hi.

i) Eima kisingsak ding dan; Gingtu khat i hina ziak un Pathian nasep hi i nuam chiat ua, thil kipak um tak a hi. Ahin, sem phachuam leh gasua tam i hi theina ding un Pathian nei tak tak hi a kul pen hi. Pathian Nasepna dinga kalbi pawimaw masa chu a hi. Jon Payne chun: "Lalpa'n ama na i sep masang in i lungthim leh i hina a daw i hi." (*The Lord wants our heart and lives before he wants our ministry and services*) a tia. Pathian chu i lungthim zosia i piakdaw masak ding ahi. Mihing in hak-satna leh beidawna haw hi tuak zing ding i hiu a, hun hak-sa a le i din zing theina ding

un Pathian nei ding a hi. Eima hatna mai hin bangma chan tungzolo ding i hiu, i galkap ding chu bang gual ahi i he pawngal ua. Eima sunggil lam ah Khrista hinpina hi galdona dinga/Pathian Nasepna dinga kalbi pawimaw khat chu a hi. A chawm lam ah gen leu hin i piangthak ngei ngei ding uh a hi, tina a hi.

Tulai hin mit ah muthei leh hitatthei khawp in thagau lam in i chau zotau ti thei in a um tai. Zia gual dinmun ah dingte chun Pathian nasep i guat sek ua le lemchang theilo a hi.

ii) Eima insung siamtup ding a hi:

Tulai chu eima insung i siamtuplo le kuaman i thugen le a ngaisak puau a, thulak in le ei nei puau. Mi'n i umdan, i tawidan leh hindan ei en zing a hiu a, bang gual in Pathian Na sem nuam leu hin le mi thulak thei ding ah i umlo chun thil khawk tak hi ding a hi. Ziakachun, thulak thei ah i khawsak uh a pawimaw a, zia dinga chun eima chiat i kisukfel a ngai zing hi. Chate etkawlna lam ahte leh insung mite tawh kal in i fel nam? tite hi ngaitua in, thagau lam foundation a kitup tak i nei

ding a hi.

2. Pathian nasepna:

Pathian nasep hi gingtute a ding ah himakmaw ahin, zia na sepna ding ah hin lampi khat bep a um puan, midangte sep tawh kibang khel khel ding tina le a hi diak puai. Eima tawh kiphu chiat ding in Lalpan lampi chuam chuam ei pia a hi. Bible in, "taksa bak hi a chuam chiat ah hin, himaleh taksa pumkhat a hi-u"(1Kor.12:12) a tia. Ziakachun, missionary in gam dang in kuan theilo maleu hin i sep theina/ i batphakna tiang ah le thei tawp ah sep thei a hi. Zia ding ah chun, a nuai ah thute hi vak ngaitua khawm kit hi tiu.

i). Invengte kiang ah: Insak Inthangte tawh kivetua mi, kipawlsek mi, kikawmtua mite i hiu a, zia hi chawndan hawi tak i nei uh khat a hi. Tuni tiang in i ching zing un thilpha tak a hi. Zia chawndan i zui zinglai ua hin invengte kiang ah Pathian nasep theina lampi tam tak a um hi. Ahin, khenkhaten zia hi hethiamlo in i chawndan uh hawi tak hi i mangkhial sek uj, ka ti nuam hi. A ziakchu, invengte i ve phat le amau haksatna, buaina leh Pathian thu lam ah a

basapnau haw vabuaipi zawlo in, kua hem khat gensiatna po in hun i vamang sek ui.

Kochuam gam ah i hiat ma mau chu Upate/Pastorte In ve (house visit) hi a hi. House Visit hin a daw i leh tup chu inneite haksakna haw vakanthak leh Pathian thu ah vathamuan ah pauchap piak chu a hipen hi. Zia gual tho ah hin numeiten le septhei ahin, vasesem ding in i kichial ut a hi. Inkiangte/ invengte kiang ah le Pathian na septheina tam tak a um hi. Pathian thu holim khawm sekete, pauchap khawm sekete hi chin dinga thilpha a hi. Mihing hinkhua matdante hi a chuam chiat ahin, thagau lam hinkhua ah le basap ngawi ngawi chang hi mitin in kinei thei chiat a hi. Zia gual hun ah chun gingu khat hina zal ah panpitu ah la vapan a hi chun Pathian nasem khat la hi. Zia ding ah chun nangma kha Pathian tawh la kal a dik a ngai ah, mi thulak thei la hi ding a hi.

ii). Khawtang ah: Zia thu hi a chung ah tawh le gawp ziang thei himaleh a chuam in ka hun kaw i hi. Mi zosia hin mun tin in mantamna i nei chiat ui. Zia

gual ah pawimawna nei i hi lai un chitthei a pawimaw ma ma ah ka hiat chu: Khenchuam nei lo ah min phatna hawina hawitak nei ding a hi. A zawng leh hat, a hau leh vai khenkhuam neina hin min siatna hawitak ei pia, zia chu siamphat kit zawlo gual khawp in mi thulaklo i khasek hi. Pathian thu ah pilna neite ma'n min hawina a nei un tichun, a chianau lampi'n le a lamzawng sek ui.

iii). Kochuam ah: Khenkhatte'n kochuam ah numeite hi pawimaw beka ngailo uh a bang sek hi. Bible in, "Khrista Jesu ah chun Jentel a um puan, Juda leh a um diak puai" (Gal.3:28-29) atia. Numei leh pawsal hina hin Pathian nasepna ding ahin bangma danglam chuamna a um diak puai. Numei in le a sem thei a, zia gual ah chun pawsalte'n le a semthei tho hi. Kochuamte kanzelna ding ah hin mitin in sep thei chiat a kinei a, ziate chu tamlo vak en khawm leu hin.

a). Pathian leh Thugin hiat dikna lam ah: Tulai kochuam sung ah hin Pathian thu hiatna lam hi tasam leh niamkiak ma ma i bangtau. Niamkiak i

hi zinglai un kochuam sung in mawpuakna chuam chuam i hun neitau hi. I dinmun dik tak uh chu puitu ding hilo in pui ah um dingte i hizawu ahi. Ziakachun, midangte ziltil thei dinga Pathian thu hiatna nei tei tei ding a hi, Chun, thugin hiatna lam thu ah hin le i tasam uh a kilang ma ma hi. Mi dangten amau thugin haw hawi tak ah a tepte lai un, ei un vang ngaisakna i vat ma mau hi. Kua hem khat chun amau thugin hawi tak ah a genlai in, ei uh thugin tawh a kibatna leh kibatlona haw he khenthei ding ah hiatna i nei uh pawimaw hi. Kochuam ah mawk um hilo ah i um tak tak a ngai hi.

Etsakna ding in i pauchap danteu haw vak gen khawm leu hin; kua kiang ah pauchap i hui em? kua min ah pauchap ding i hui em? ti thu bang hi tam tak in hechian nailo i bang ui. A dang tampi; baptisma thute, Lalpa Anthiang kipawl khawmna haw hi hiat a pawimaw hi. Ziate haw hi Pathian na i sepna ding ua pawimaw a hi.

b). Puitu hina ah: Kochuam sung ah puitu hina/ mawpuakna tuk hi haksa maleh Pathian malzawlna khat ahi. Tinglo tak himaleu hin Pathian kochuamte etkawlina ah mawpuakna chan thei hi kipak um a hi. Ahin, zia mawpuakna hi i tuklai un pilvang a ngai hi. A ziakchu, mipite puitu dinga guat i hui a, mi sukthasiat thei a hi. Kochuam ah department chuam chuam: Anchang ham thu, sum sukpun thu leh a dang dangte haw bang ah hin mi thasiatna bawl thei a hi. Na neucha cha himaleh Pathian na sepna ahia, pilthei a ngai hi. Zia haw zosia hi a dik jel theina ding ah chun Pathian puina a pawimawi.

3. Thukhakna: Pathian nasep hi thil pawimaw tak, gingtute a ding ah chun seplo theilo a hi. Zia na hi vamawk sep thei leh sep guat ziang thei a hi. Ahin, ga pha sua ah Pathian pawm tak leh mi dangte'n le ei nek theina ding ah chu eima lam kisukfel a pawimaw ma ma hi. Sawlchak Paul in, "keimau hi Khrista nasemtu leh Pathian thuguk enkawlte gual in ei ngai. Zia enkawltu hina ah hin mi

ginum hi a kul hi.” (1 Kor. 4:1&2) I pauchapnau mi nuisan mai mai hilo ding in, thu i genlai ah mi thulaklo i hilona ding in chingthei hi tiu. A chung ah i holimnau hi

bukimlo tak himaleh neucha khat bek ah malam zuan ah kal i suannau ah ei panpitu hi ngei ding Lalpan ei malzawl piakta hen!

--o0o--

GINGTU GINUM CHU BANGLAM KONG ALE A GINUM DING AHI.

- Rev. Pauneithang

Thupatna:

Gingtu hinkhua ginumna hi a poimaw ma ma ahi. Bangkima alian aneu tilou a ginum mai a ngai ahi. I Lalpa Jesu ngei inle hitin a gen ahi. “Kuale tawmcha chung ah ginum chu, tamtak chung ah le a ginum hi; kuale tawmcha chung ah gin umlo chu, tam tak chung inle a ginum ngai puai.” Luke 16:10.

Thil neucha chung a diktatlo chu, thil liantak chung a le a diktatlo ding tina ahi.

Gingtu hinkhua ginum ding dan toh kisaia points phabep, I phatchua-mpì ding uh kinem in en khawm hitiu.

1. Thuak mualsua zo dinga ginumna.

I Korinth 13 na chun, “Hepina’n a thuak ham ham a,” chun “hepina’n a thuak mualsua sek hi” ati ahi. I Lalpa Jesu ngei inle Kross a ahung thuak a, thi tiangin chun zaw na a hung chang ahi. Nang le kei inle ziaziaak ahin hukdamna I chang thei ta ahi.

Suapite, I Lalpa Jesu I ginna hi, tu khawvel a ding bep ahipua, kumtuang a ding ahi. Ama’n le a tawp chan a hung thuak mualsua a, thitianga a hung kipiak gual in. Suapite, a hinna thisan a ei tatdawna chu I ging zou ding ahi. Chun, Jesu a dingin ei le I hing ta ding ahi. A tawp chan a bang-gual I tuak inle Jesu a dingin I

thuak mualsua ding ahi. Kalveri Kross a anasep zaw sa a chun tu le kumtuang ading in I kinga top ding ahi. Zia ginna chu I thasuak lou ding ahi.

2. Committee na a ginum ding.

Committee hi I Kochuam kuang tolna, iki vaipuakna ahi. Ziakachun, Committee hi I gel pawimaw mama ding ahi. I kochuam sunga Committee te; Pa te, Nu te leh Khanglaite akihi ahi.

Committee na I hatlouna teu khen khat en hitiu:

i) Attendance: Buaina khok tak nei a Committee panglou chu ngaithiam thei ahi. Ahinla buaina talua le umlou Committee pang ngai mong mong lou, buaina leh sepding thildang paulap leh si-amkom bang mi um sek kihi ahi. Committee hi Kochuam a dinga kivaipuakna decision making ahiziakin, I gel poimaw lou takin le tu apat I gel poimaw mama ta ding ahi. A thei laisia, attendance a pang zing ding in kigelthakna nei thei ta lehin pha ma ma ding ahi.

ii) Mani a gual a koilouna: Committee hi mani a gual a gelou leh koilou aki tam mama in ka mui. Pathian a ahi, pawlpi a ahi ti chu, a dik ahi. Ahin a grep

huan a nasep I hi ziak un, Kochuam te, member zosia'n Mani a I gel poimaw gual ua a kimkhat bek lungthim leh titaktak na pe leu hin, tusanga ki khangtou zaw ding ahi. Lalpa'n vang ei ma a gual a gel a, titakzet a pang dingin, Abel thilpiak guala, Committee na a phapen, a hoipen ama pe dingin ei doi ahi.

iii) Jesu Khrista Kochuam luchang a pakhatna koi a, Committee chia kitam lou: Kochuam kimatchakna Committee na phot a, a tillai a chun phadeu na'n tin. Ahin tulai ahin, Committee na agenda te I genkhawm lai uh leh, resolution te I pass ding I genkhawm phat ua leh, Jesu'n zia dinmun a hin bang gual lungthim a pu dia aw? Jesu ngaidan ding gel zing kom a Committee hi mang zing thei le hin chu, Kochuam buaina I tuak te, tuak ngai keilou tampi um dingin ka ging cha ahi. I kini-al na teu haw en thak kit leu hin, ki nial ngai kei lou ding le aum ahi. Ziakachun, Committee I chia kit phat tak ule, Pa te, Nu te, KKP te, Lal Jesu a khatna a koi zing kom a Committee mang dingin iki chial ahi.

Committee a l hat nau khenkhat te:

i) Piangthak leh Kipezou, Khrista leh a Kochuam a dinga mi phabep ki um ahi.

Kochuam a tia l chia thei liai liai nau hi, a hatlou tamtak a um lai in, Khrista a piangthak leh ginum, kipezou tak te Kochuam sungin a um ahi. Ziate haw ziaka chun Pa te, Nu te, KKP te, a Kochuam leh a bak zam department te Lalpa'n a gel poimaw a, masawn zel in a pui ahi.

ii) Kochuam te'n ginum taka sum le pai ah a phungvuknau.

Kochuam sunga a neupen apat a lianpen tianga, Khrista a dinga kiphalna ziakin, sum le pai te, thawlom te, bufaitham te, veilam ham anchang te leh a dang dang te haw a phungvuk na teu mangcha in, Pathian in a Kochuam ding zingin a koi ahi. Chun, mi atamzo te'n, Pathian chantum a sawm a khat bang piak lou khak ding lau in, akin theipen a pia tamtak a um ta ahi. Pathianin malsawm dinga akitepna chu sawm a khat pe te chung, bangtin em a piak lou ding? Malsawma ah um ahiziak ua, piak ding a gel

poimaw uh ahi. Pe tute chung Pathian a lungawi leh, Pe tute leh Kochuam malzawlin a um sek ahi. Kochuam te'n Pathian a biak ding bangtaka a biak ua, kiphala taka akipiak nau zalin, Kochuam phungvuk in aum sek ahi.

Committee chu sum umlou a hitheilo ahi. Agenda leh resolution thu kipass te haw le sum umlo a bawzui theilo ding a tamzo ahi. Kochuam te sum le pai a phungvukna ziakin Committee te le a sem hat thei uh ahi.

iii) Thagau leh taksa lama piting leh ching l lak ua um te.

Kochuam kuang tol na hi, a sunga um te mama ziakin buaisia vang vang in a um sek a; ziagual ma chun, a sunga Thagaumi te, leh taksa piting leh ching te haw mangcha'n buaina ding lakin veng him in a um sek ahi. Ziakachun, Kochuam kivaihawmna Khompi, Standing Committee leh committee chuam chuam um te adinga l pauchap zing sek ding ahi.

3. Sum le Pai a ginumna.

Gingtu khat sum le pai a ginumlou chu, khawvel mite leh

gingtu chanpi te'n le, taksan thei-lo a eikoi ahiu ti l he ding ahi. Gingtu khat chu Pathian leh mite anga 'sum le pai' a ginum tak a ium ding ahi. Kochuam 'sum le pai' chung vang ahin chu, cheng khat chungin le l ginum ding ahi. Pathian kianga lat maicham te, anchang ham pauchap pum a pe te, meithai chaga te natiang inle a nei sun sun teu bang hung tho ahiu, zia Pathian sum ahiziakin, l gin umlou ahichun Pathian in l chung a vaihawm ding ahi. 'Sum le pai' hi, a nei te le, aneilo te le, kiting tak tak kuama aum theilo ahi. A diak a eilam thing-tangmite laka. Ziakachun, 'sum le pai' hi a mu na tam neithei te chu kipakpi aum na chungin, a poimaw diak chu, amuna tam leh tawm sangin le, 'sum le pai' mat thiam a poimaw zaw ahi. Nu le pa'n pan a hung la ding ua, zia ban a chun, 'cha le nau' te le 'sum le pai' mat thiam dan a ziltit ding uh ahi. 'Sum le pai' l et-kol dan inle l thagau lam a sukha ahi ti l geldok ding ahi. Pathianin a chate taksa le ngonchang, basam leh chaga taka umding a doilou ahi. Themtu ngei inle 'Sum le pai' a taksapnate, 'Sum le pai' a kihetthiamlonate, nekguksak

nopnate leh a chuam chuam in, Pathian lungloulamin pui mang ei go zing sek ahi. Lalpa'n 'sum le pai' a ginum dingin, a tawp chan a demna bei a umdingin ei dawi ahi.

Thutawpna.

Gingtu banglam kong ale ginum ding ihi dan uh thokhatna ate, kochuam committee na ate leh 'sum le pai' a te ginum ding dan l en khawm ua. Tawmcha chung a ginum chu tamtak chung a le ginum ding ahidan leh, tawmcha chung a ginumlo chu tamtak chung a le ginumlo ding ahidan te l he tau ahi. Suapite, Lalpa'n l phakna kham kham a ginum ding ei tina ahin, demna bei a um thei dingin pan lai tiu.

--o0o--

HUN MAT THIAM LEH PAU DAN PHA

Sam 90:12; Joh 9:4; Sam 19:14; Eph 4:29; 1Pet 3:10

!Rev. Seilunlal Vaiphei

Tuni hin gingtute malam i kalsuan zel nau ahin thil pawimaw diak ah kahiat zia chu hun mat thiam leh pau dan pha ti thupi hi gen khawm ding i hiu. A pani hin Khristian hindan pha nei mi hitheina dinga thil pawimaw gel gel ahi. Pau dan kilawmlo leh hun mang phalo chu khristian hindan pha nei aki ti thei puai.

I. Hun mat dan thiam:

Hun hi mi zosia a ding ahi. Mi Hausa leh genthei, mi thiam leh thiamlo, mipil leh mimawl, kuanle hun hi ki bang chiat a ki-nei ahi. Hun hi khawl kawm thei ahi pua, apet ah mat ngal ziang ding ahi. A chu tilo chun khaw dang sawt le hin ei chia mangsan ziang ding ahi. A nuai ahin hun mat thiam apawimaw dan chawm chan ala en khawm hitiu:- Pathian in mi zosia hun kibang chiat a piyai: Pathian hun siam kum leh tha, sun leh zaan hi a lul ma ma a, sapten 'hun hi dangka ahi' ati hial uh ahi. Mihing ten nikhat hi dakkal 24 in i khen ua, a hau a vai, lal leh chagate leh Pathian in kibang tak in nikhat in dakkal 24 ei pechiat hi. Khenkhat in phachuam tak ah a mat lai in khenkhat in a petu Pathian daw-

ilo lam bawl na leh amau a ding ah siatna kibawl dawnan a mang sek ui.

Pathian in hun ei piak mat thiam a pawimawi: Pathian in Hun ei piak hi a chia zel ahi ziakin kuama a ngak puai. Hun mat ding ah ei ki pia chu tu hun bep hi ahi. Hunte hi abei zel a, a chia mang tasa te chu ko kit thei ahi puai. Hun chia hat dan hi ngainep ding chi ahi puau, i mawk mat liam mai mai hi a khawk ma ma sek hi. Hun mang pha hi ding a chun a chiat hat zia hiat chian a pawimaw hi. I matsua ahi chun mukit a um thei ta puai. I khut a um tu hun hi apha thei pen leh mantam thei pen ah mat ding ahi.

Damsung hun mat phat ding dan chu bang gual ahi diam? Paul chun "nite hi a phat taak lo ziak in la hun nei sun uh mangpha

tau in, mingawlte gual ah umlo in Lalpa dawilam chu bang ahem ti hiathiam gaw zaw tau in,” a ti (Eph 5:16-17). Thugentu ah le bangkim a ding ah hun guat a um thu leh hun lemchang a um thu l mu ahi(Thugn 3:1ff). A chawmlam ah gen ding in i damsung ah i nisin hinkhua Pathian dawigual hiat guat a, Pathian dawigual i bawl ding ahi. Bible chun, “La thinlung in migilo eng kin la, nitum in Lalpa lau in mu zaw’n, kipakman um ngei ding ahi ngal a, la kinepna chu sukmangthai hi puan’a” a ti(Thulp. 23:17-18).

Nisin hun mat thiam apawimawi: Hun hi hinkhua matchak ahi. Mi khenkhat chun hun a ningtel ua, a mat dan le a he puau a, bangma lo in a sumang thai sek ui. Nawp bawlna leh thil phachuamlo bawlna ding in hun tam tak l chia mang sak sek uh hi. Tulai in mobile phone l mang nasa tau a, a etna ding in dakkal bangzat l subei uh em ti tepte leu hin lekha simna leh thilpha bawlna hun sang in tam zaw mai ding ahi. Lekha bu hawitak phatchuampi bawlman mang leu hin pha ma ma ding ahi.

‘Hun ka nei puai’ a kiti ziang sek ah zia hi l mat thiamlo

ziak uh ahi nuam sek hi. Nikhat a dakkal 24 i mat dan ding hi athei chan in guanggal lawkna nei leu hin thil pawimaw i bawl daw uh tam thei ma ma ding ahi. Thil bangkim ahun tak ah bawl hi zil angai a. Hun guat sukpel sek hi thil phalo taka hi.

Hun mat dik: Hun hin kuama angak ngai lo ziakin i mangpha nau em? ti hi iki ngaitua zing ding ua thil pawimaw tak chu ahi. l hun mat dan hin kuaman ei kikawppi puau. Eima thu’n i sem i bawl mai zaw sek ahi ziakin mimal mawpuakna ah kinga ahi. Nu leh pa leh unaute’n maw hun tiang in paw ziang leu le, ahi tak tak achun eima mawpuakna ah kinga ahi. Ziaziakchun, mani kithunna kawnga athak ah panlak zel a pawimaw diak ahi.

Mipi ki khawp khawmna nibik phat leh hunbi guat a um sek a, zia chu diktak ah zui chiat a pawimaw hi. A diak in puitu lamte kochuam biakin kikhawpna hitaleh thildang ah kikhawp khawmna ate avagei lam sang ah avai malam del chiat ding ahi. Hun i mat thiam lo chun midangte simmaw i chan baka, maban ki sawmto theilo ahi. Chun, hun kiti hi eima khut ah um ahi ziakin mat

thiam apha. Hun mang thiamlo mi chu asepe abawl in lamzang tak tak theilo ahi.

II. Pau dan pha:

Mihing khat chu Pathian in ahepi ziakin thilpiak lopi tak mai apia, zia athilpiak chu adawngtu chun apha lam leh a sia lam in amang tua thei gel gel hi. Ziaziakchun, kua hitaleh Pathian dawidan leh kisumtheina tawh malam kalsuang tute chun zaw na achang sek ui. Zia gual chu ahi ziakin a nuai ahin gingtute pau dan ah pilvang ding ihi dan teu chawm kim chan ala en hitiu:- **Pau dan pha leh phalo a um hi:** Pathian in mihing te thilpiak lul tak pau theina kam leh lei ei pia, zia chu a sia leh pha in a mat thei gel gel hi. Jakob chun, “Kam munkhat a pat in pakna leh hansia law na a pawt sek a, suapite haw, zia gual ding chu ahi puai” ati(Jak 3:10).

Mi kam dam, aw nem kiang ah um nuam i sa, mi aw khau, mi hansia kiang in kuama a um sawt pei puai. I kamsuak hin mi dang chung ah a pha leh phalo lam in nasatak in a khawisek hi. “Dawnhuna aw nem chun lungnatna ahi dai sek a, pau ngaida

um chun lungnatna a chawk tho sek hi” ti imu(Thupl 15:1). Pau dan phal lul dan gen in, “midik lei chu dangka pha gual ahia... mi dik kam chun mi tamtak a chawm hi” ti thu le i mu(Thulp 10:20-21). I thugen hin mi dang chung ah bep hi lo in eima chung ngei in le khawi(affect) a nei sek hi(Thupl 18:20-21).

Thinlung leh kamsuak in kizawpna a nei hi: Lungthim hi mihing khawsakna a ding ah apawimaw bangkim ngaitua dawktu chu ahi. Pilna leh thiamna hungkhang lian zelte hile lungthim mangthiamte ngaitua na ki pat ahi. Ahinla, Jer. 17:9 nalam i et chun “Mihing lungthim chu thildang zosiasang in a sia zaw’n, chinchan bei ahi ziakin kua ahem hethiam thei ding” tin ala gen hi. Zia chu hitaleh thilphalo him him hi lungthim phalo apat ah hung pawt ahi. A guk ah suangtuana phalo chu a taksa ahung kilat daw chun kinialnate, kinaknate, kidonate leh kikhennate ahung um khawlaw sek hi ti hiat chian ziang thei ahi. Mi kiveng thei chun a lungthim lo gual in thu a gen thei a, lungna ma ma leh le lunna lo gual takin a kilawm lamin a gendawk thei hi. Chun mi khenkhat chu a lunggel a

chuam, a thilbawl a chuam, a gen a chuam a um sek a, ziate chu le a hiat thei tho a, zuau gen, amau leh amau kithem ahiu a, khristian hindan dik ahi diak puai. Jesun Pharisaite kiang in, “Lungthim ah dimlet kam in a pawt sek hi, migilo chun a gobawm sia a pat thil pha lo a sek dawk sek hi” ati(Mat 12:34-35).

I kamsuak ah maw i puai: Mihing khat chu a kamsuak ah apilvan angai ma ma hi. Khat vei thil phalo a gen tak chu nawimang thei ahi ta pua, hiat zing ahi sek hi. Khat leh khat kikal ah kituaklona leh buaina siam dawktu chu paukam ahi pen hi. Pathian thu chun, “La kam ua thupawt chu chi gual ah al, hepina pang hizing ta hen”(kol.4:5) ati. Ama diklona leh thiamlona ngei ah le mi dang maw chan sak gua tei tei mi tamtak a um hi. “Ka dik lo ahi” “Ka bawlkhial ahi” ei ngai thiam in ti hi haksa i sa sek ma mau a, zia chun gingu hina i miziau a sulang sek ahi. I lei ven phat a ngaidan leh i ven phat zo lo dan Jacob in a gen in, “A thugen ah thil hikhial ngai lo chu mi piting ahia, a taksa pumpi veng thei ahi” ati(Jak 3:2).

Mi zosia'n i kamsuak ah

maw i puak ziak leh i kamsuak ga luak ding I hiziak un lungthim leh ngaituana mang ah chingthei tak ah Bible ei hilna gual ah i pau sek a pawimaw ma mai. Thupil chun, “A kam vengpha chu a hinna veng pha ahia, a kam lian tak ah hang chun vang manthaina chang in a” ati(Thupl 13:3). Paul in, “Thu phalo him him la kam un pawt ki hen, a kul dung zui ah siam pha ding in thupha cha cha pawt zaw ta hen, a la ngaite ding ah hepina ahi theina ding in” ati ahi(Eph 4:29). Chun Peter in le gitlona lak ah lei vengpha ding in kichian tak in 1Pet 3:10 in eigen ahi. Tichun Khristian hindanpha nei hi theina ding in lei veng phat leh hun mat dik hi a lo thei lo chu ahi.

--o0o--

“Mission to the Blind: Tilkhona program” report

Report petu – Pro. Pastor Khaiminlun Vaiphei

Thupatna: KSP in “Mission to the Blind” te saina tilkhona program uap ding a chialna a mu dungzûi in Rev. Pauneithang leh keima Pro. Pastor Khaiminlun a uap ding a guat in ka la um u hi. Zia program hi tarik 26/05/2022 ni in Centenary Hall, New Lamka in mat a la hi. Zia hun a hin piandân chuam/hîna chuam-te (differently able/specially able), Pastorte, mimal veina nei-te leh a dang dang hun khawp kala pang uhi. Sim tute zosia lungthim ki hawng tak in zia program report ala sim tha suk hitû.

1. Program chiadân tângpi:

Conductor in Tv Douallem Neihzial pang in, program hi session li (four) in a kikhen hi. Conductorpu hi khawmulo ahi vang in Bachelor of Divinity (BD) zo ahi.

I. First Session – “History of Blind People and Mission to the Blind (M.T.B) inception” by Mr Rajesh Subha, Senior Manager HR and Training.

II. Second Session – “Blind people and role of church and society” by Mr. Brilliam Lima, Area Director

III. Third Session – Blind people and you - kihêt tua na

IV. Fourth session – Group discussion

* Special no. – Nu Neihching leh Mungbawi Neihguk

2. Program apat hetding a kilawmte:

Program a kimat dân tak a zik gaw lehin haksading ahi bâk ah zil daw leh het ding tawm ma ma ding ahi ziak in anuai ah kitian gual in a point in sim thasuk hitiu.

2.1. Mission to the Blind Chanchin:
“Mission to the Blind (M.T.B)” hi (fâmta) Mr. Sam R Thanaseelan in tarik 1 June 1992 in ala phu daw (Founder and director) ahi. Government tawh kihetua in, tax le piak ngailo in kum khat a khatvei chartered accoun-

tant in audit a bawl sek hi. M.T.B te hi Indian Missions Association (I.M.S) ah member le ahi bawk ui. Chun, M.T.B hi Kristian pûitu mun chuam chuam a pat hung ki-kai khawm “National Board of Trustees” te’n a et kawl ahi. Tu dinmun a hin semtu numei leh pawsal ki gawm in 126 aphâi, zia bâk in mit-thûm 30 le pang in India sung ah state 19 in asêm uh ahi.

2.2. *Mithûm umzât*: Cencus 2011 dungzûi in Manipur mai mai a hin mithûm hi mi 19,194 a phazo hi. KSP dân zokim zât sang in a tam zaw uh ahi. India pumpi sung ah um zât hi 43 million (430 lakh) tuam lak hi in hêt ahi.

2.3. *Tup leh Vision*: M.T.B pawl (organisation) in a tup chu “khawmûna tasam/khawmulo te tawh kituak tak a mâ suan khawm ahi (holistic development of people with visual impairment.” Chu leh amau chu kochuam leh khawtâng a kihel/involve sak ding ti ahi.

2.4. *Lekha sim sak ding*: Khawmûna tasam te a ding a lekha

sim theinna leh chanchinpha thil hitheina a amau chu kinepna leh thiltupna nei sak ding ti hi nasatak mai in a bawi zui zing uhi.

3. Khawmûna tasamte duthusâm:

Khaw mute’n khawmulo te imu tak leh panpi nuam se taluan tawmngai takin pha l sak sak iva bawl kha sek ahi. Ahi’n zia haw zosia chu a mau pawimaw ala hi khel lo ahi. Panpi nuamte hêt ding a pawimaw khenkhat te –

3.1. *Mawk thip lo ding*: Khawmulo te l king a um a hi lam l hêt tak uleh mawk thip thut ziang lo ding. Aziak chu amau a ding in ‘kei thu eigen uh ahi di aw!’ti a ki ngaisia um thei.

3.2. *Kithuapi ding (fellowship)*: Amau hi mitthûm ahi ziak ua kawi chuam ding ut lo ahiu. Kithuapi in pângngai tak a kiholim pi leh nui khawm pi ding a ud ma ma uhi.

3.3. *Beng vâk ma ma a hiu*: A khawmu nau tasam ahi vang in a khaw hêt nau a beng uh a vâk mama ziang ahiu. Ngai tak a a bilbûk ua kiko

in va ho lim pi khak ding
bailam mama ahi.

3.4. *A mamaw uh dawt ding:*

Khen khat chu panpi nuam
taluana, a mamaw ule kan
sese lo in a taksa/pum uh
man in thagum a pui suk mai.
Zia gual hilo ding, awlcha
va holim pi ding, chun lampi
kan nuam/ kitawnpa nuam l
hi leh a khut uh a het kham
ding ua vak bet (tapping)
mai ding. Zaw leh amau in
a khut uh l kiu (elbow) ahi lo
leh l liang (shoulder) uh hun
tu mai ding ahiu.

3.5. *Sum/paisa mawk piak-*

lo ding: Sum mawk piaklo
ding ti hi amau ngei ngei in
agen uh ahi. Lampi vel ah
khaw mulo l tuak khak leh
a mamaw uh dawt zawk
ding. M.T.B leh khawmulo te
hi bangma semlo a khutdaw
(begging) a sum hawl ding
hi nasa tak in a kikhawm uhi.
Ahithei laisian kitena ser
(weight machine/scale) bek
tawh sum hawl ding a tup uh
ahi.

4. Iki khawppi khak leh:

Amau hi biakinn ah iki
khawppi khak ahem iki holim

pi khak hem ahi leh anuai te hi
tepte hitiu:

4.1. *Biakinn sung umdan gen*

ding: Amau hi khaw mulo
ahi ziak un, kikhawpna bi-
akinn sung um dan gen piak
aphai. Pasalte chutna, nu-
meite chutna, achutna um-
dan leh a dang dang gen
pi ding.

4.2. *Minute sawmni (20):*

Amau hi program umdan gen
ding, chu leh amau hi 20-
25 minute vel hi lunglut tak
in a chu zo uhi. Zia hi hetpi
zing kawm in kikhawp zel
ding ahiu.

4.3. *Bible pansat ding hil a paw-*

imaw ui: Eipau tawh kinai
pen mitthumte bible hi mizo
pau bep a um ahi. Amau Bi-
ble hi danglam deu ahi ziak
in bu khat a kigawm ziang
lo ahi ziak in volume 42 set
apha hi. A Bible uhi a bukim
a puak vel vel lemchango
ahi ziak in kikhawp kit tak
leh l Bible pansat ding hil
lawk thei lehin amau a ding
in na vak mama ding ahi.

**5. Inn a khawmulo te l vaitun
khak leh:**

Khawmulote inn ah

khawlailêng l nei ahi chun a nuai ah point te hi tepte hi tiu:

5.1. Innsung din mun gen masak ding: Innsung bang gual a um a hem, mi bangzât um, kua kua um a hem ti gên chian pi ding.

5.2. Ann l nêkpi tak leh: Ann l nêk pi khak ahi chun, kuang lailung tak in ann kawi ding (place the rice at the centre of the plate) chu leh a ning/ side ah me, malchame leh ann tui l kawina mun haw hil chian ding. Tekhina'n, ann kuang amau khut ah l piak zaw tak leh - malchame 9 O'clock a um, ann tui 12 O'clock a um ti ah gen piak ding.

5.3. Thingpi/tui ipiak ahi chun: Thingpi ahi lo leh tui vel l piak ahi chun a no kimkhat (1/3) sang ah tawm zaw deu piak ding. Mawk piak/ mawk tun piak ziang lo in, a no chu amau khut ngei ah khawi sak phawt in piak a pawimaw ma ma hi.

6. M.T.B te l panpi theidân chuam chuam te:

Mission to the blind te hi kithua pi nuam l um chun a nuai

ah kizik te gual in panpithei ahi.

6.1. M.T.B mission hi pauchap piak zing ding.

6.2. Pauchana puitu leh sum le pai kithuapi ding a pan latu hî thei.

6.3. Amau mission a sêmtu ding in ki piak daw thei (volunteer).

6.4. Monthly/quarterly/annually/special occasions ah sum a panpi thei zing.

Thukhâkna:

“Mission to the Blind” tilkhona program kimatdân zosia zik thavek theilo ihi ziak in hêt ding a pawimaw te bep theidan dan a hung kizik ahi. Khua muthei a nuamsa tak a hinkhua mang ihi lam kihe pha lo in, l khaw mu nau a l thil dawi ding tampi um in a ki buai zing lai in, khaw mulo te'n chanchinpha Johan 9:3 hi pansat in, khawmulote'n le Pathian lopina sulang ding in theitawpsua in ala pang zing uh ahi. Simtu te'n le l panthei dân dân in pang in khawmulo te kithua pi in en le Pathian lopina sulang zel zel ding iki chial uh ahi. Simtu zosia Pathian in hun malsawm ta hen.

--o0o--

Zipha nei leh pawsal pha nei Pathian dawisa- ka, mihing dawisak

-Proverb 12:4, 18: 22

~Upa Th. Lalcha

Ziathu hin chawmcha holim l nuam uh ahi.

Tulai ahin kichen nahi mun mama in aum ah khen khat in kiang nei atiu ah tuni l gen nawp chu a kiang mai mai nei sang l n thitiang ah kikawppi kiti leh dik zaw dingin ginchak leh a hawizaw hi ding in l ngaitua nan aum zaw ahi. Tulai ahin kichen na hi abai a bai in le kichen theina a um ta. Nupan kichen na ding ahin adan tak achun (vadawt) (Thingpiawm) chu ahi di dan chu ahi Abraham in le a chapa l sak, ziding dawn in a sawl hi Genesis 24:4 ahin la tulai ah Phone ale zi di kihawl ah kichenle a um tho ahi. A bangchu hitaleh zipha leh pawsal pha chu Pathian phasak a pawl mawi ti l Pathian thu bu ahin aki mu Luka 1: 2-28 van sawlchak in mari chibai abuk a kha Pathian dawichuam la hi, atia Matthai 1: 20-24 Joseph Lalpa Vansawlchak in aphot sak pi zia in Mari chu akichen pi tai.

Tulai hin Pathian malak nu leh pa phatsak le hilo ah kicheng chawm lo ah kikhen le aum d apuai. Phone ah kiho video ah kimu kicheng le aum da puai ti l hia chiat uh ahi. Lamdang kasak ka mu leh ka hiat khat 2019 kum akhan phailam zuanin (Line) bus ah kachuan suk leh ka masang ah chun pawsal pani akichuu ah phone a chun numei khat hi tawh akiho ua akihodan uh chu aki zampi ding dan in akiho ua. Bish-nupur kavak phak suk phat un khat pachu a front sit driver pa

kiang in ava ki chu chawm khat ti in. Nungak khat lam pam ah ding ala um ah ka ang ah chupa chun amu phat in gari a kham ah zia nungak nu chu ahung kal ah ka ang ah chupa chun a kiang ah chu ding in avak ko ah amanu chun lalawi pa la tin ahun hawl ta ama pan le a vak kaw mu leh a nungak nu chu ahung lungna ta lim(photo) lei hun thawt uh kha zia pa khu ahi puai tin a phone ah a lim chu tawh a pawsal di pa chu a et tuak leh dik asak lophat in ahungkina tau

ah, nungaknu chun hepa en in ei thawt uh chu zia hi ahin ama khu ahi puai tin lim chu ei etsak ah alim pen chu mi melpha mi ngo ahi gari sung ah umpa chu mi vawm mi gawng thim khat ahi chawm khat ka tai suk ua keinou, kaphak phat un gari kham un ti aj akiko phat in gari ahun kham ua apa thum ua akum ua bang-gual achang ta diam uh chu ka-hia kit ta puai. Kakiang ah ki chu unau te Meitei ten ei dawng ua thilum dan chu kagen leh amau in le kei uh um na Tera Khawng ale zia gual khat chu aum in anumei nu chu a za chak ziak in akithat hi eitiu ah. Ka ngaitua na chun kenchu kamang khawpna phone a le zia gual thil chu umthei ahi lam ka hia ua. In ka tun in katute kadawt leh hepu akibawl thei hi ati phat un kanuu tawh ka ki ho nau ah chun khawvel pilna hi chu naw kakitiu ah. Kanuu in ei dai ah nangle ltupa pa lim nungak khat thawt in la kiho pitia bang ahung gen em tin kidaina kamang tau. Zia te chanchin apat chu tulai khangthakte pilvan din dawium l sau ahi.

Zipha leh pawsal pha nein a ding ahin pate phat sak na hi le adik diak leh ahi diakk

puai. Pathian phasak pi na a lasting zaw ahi ti hi midang chung ah gen ding chu tampi aum ah. Ahin, midang chung ah gen lo in keima ngei in ka tuak Pathian min lopina ding in chawmkim chan ka hun tak lang hi. 1963-1964 zia hun lai ahin mun chuam in class V-VI sim in ka va um ah 1965 kum ahin in lam(khua lam) Langmaiching katung ah, Andro ME school in class VII ka admitted ah thathum lam ka kai nung in ka pa chu adampua a keng lang khat zengin aumphant in Doctor te koin ka etsak ua LAwi chal khat Rs 350/- bawng pi khat Rs 120/- kazuak ah kakai tuau ah apha diak ua lokai di umlo phat in ka school kai le zawm thei ta lo in phailo kai in kapang ta tha khat thani zaw in Revivalist Pu Neihau te haw ahung ua nitak khat chu hoin kihawp na apat in Kapa pauchap piak ding in apau hiat lo uh tawh ahung taito ua zia hun achun keima kappa umpi leh zenin in ah kaum ah pauchapna a hung nei piak ua tuanglai achun alik vel ua zia ni zan achun ah pauchap zawu achun lamka umpi Pi Pakhai nun thu a gen chu la pa hi nithum tin nil eh kihawm ah chia

zo ding ahi tai a tia Pi siamkim pi leh Pu Kampu pa chun La tak-sang em? Eitiu ah, zia hun lai ah c hun Thagau thiangtho nasep chu kamu khak lo zia in adawn hu chu hak ka sa thumvei ei dawt phat un Pathian thu ahi chun ka taksang hi kati phat in ei nusiau ah Biakin agen gual un nithum tin ni Pathian ni chun Biak in kikhawm ah ei pui in ahun tia mak ka sa that hum tha li lam lupna le khel lo pan kikhawp di ahun sawm ah a tiang khut ei pian a tia ka pia awl awl in lam suk ah chun a ban langkhat ka tu ka chia pi ah Biakin ka tun un a tiangkhat asepta biakin sung in a ki chawp lut thaw ah Biak in sung ah umte, tekse hawchun pulpit mai chun alupsak ua Pu Neihau in pauchapn a anei piak ah. K apa chu thagau hung chang in Halle-luah tin ahung kichawm ah zia phat chun ahung chia thei thim ta kappa ahunh phat deu phat in ka unun danthiang ah pawsal ahung nei kit leh in sung chu sep leh bawl lam in ahung basap phat in Nu leh pa ten zi nei ding in ei them tau ah kei chu kanuam pua lnsung lam ka et leh kabei a dawng ah kaki ngaitua ta nu leh pa ten a phasak uh chu pute cha-

nu ahia. Amanu chu mimelpha mi ngo aduangting mama khat ahi Thingpi awm ding agen lai un kani kani kamcha nu Pastor Soik-hothang zi chun ei ko ah, ka chia leh insung dinmun chu ahaksa tai lanu leh la pan zi nei ding atiu hi pawm tan ahin lah kumtuang ah haksatna leh nawp hun ale laki kawppi ding ahi zia in Pathian l dawt phawt ding uh ahi a tiphat in kenle pha ka sak pi ta lupkuan hi hen la dai pauchapn amun a te Pathian kiang in ka kikoppi ding zi pha ei pian tin ka dawn sek ah kani ngei in le thagau lam ah aseppi apauchappi te tawh Pathian kiang in kei zi ding chu ei dawt pi tau ah ni bangzat ahem a chia zaw in nitak khat chu biakin kikhawp mipi pel zaw phat leh Local Member te leh Thagau nasem te sia pel nailo ding in thupuan Upa Lamkai zinu chun ahun puang ah zia hun lai ah chun kei chu dak khen ah kapan laitak ahia Lal Biakna to zaw in mipi a pel tau ah kei chu kawt khak ding leh khawnvalpi(Petrol-mex) kawltu ka hi zia in anu nung di him chu ka hia nungak lam ah mi 2 a min ua avak ko ah nang uh le pawt nai ki un ahuntia amau teni le aki chu kit tau ah.

Thu ahun gen ah Kochuam sung ah nute pate haw Pathian thagau in ei musak leh gen ding ei piak chu Tangval Lalcha leh Nungak Kimnu hi a dam sung ua kikawppi di leh ginum leh Thiangtho tak ah kichenna nei ding in ei musak hi ahun tiphat achun kapani un ka kun chak gel tau ah. Kingaitua nan ka dim ah ti chu nu leh pa dawisak hitalo abangtik lai a le l gel khak lo l zi ding ah ei kigen piak ziang chu lunggel chu ahaksa ta Pathian kiang in, Lalpa nang in thil bangkim la ia lalemti gual in ei kawi mai in tin Pathian khut in kakawira, Taksa achun khawkhat ah chengkhawm aki hiziak in kimutua le ahaksat na bang le ahung um sek ah. Ni sagi vel a hung tin ahin a nitak khat chu kikhawp pel in malai achun tangval te nungak khat in ah sawm a ki giak khawm sek ah, sawm in ah ka um pet in Kimneu, chun a nau anuai a pa ahun sawl ah hepu, ka un hungvak tiam in tia ei hungko sak ah, Kalawiten a hiat phat un chia in nungak in ei kochu mivangpha lahi tin ei hundai ua kei le chawm khat kaki ngaitua ah a tawp in katheile(lilu) kakilak ah mut kawm in ka chia ah kawtbul ka tun in kavak

ko ah kawt ei hawn lo di maw ka ti leh, hawn ma ma ing ka ti in ei hung hawn ah tap kuang a meitina lam ua chun chutna ei dawpiak ah hepu kichun ei tia kaki chu ta, bang gen nawp la nei ahem lei hung kosak ah kati leh anui ah. A bang hileh zia hi dawn phawt in tin thingpi eihunpia akimkhat ladawn di a kimkhat ken kadawn di ahi atia kala kadawn leh a kimkhat sang ah tawmzaw deu kala dawn kha atam zaw hi tan ahka ti leh a khawk puai puai ti in kadawn bangsia chu adawn zaw phat in ahunggho lim pan ah nitak khat Thagau mite Thupuan kha bangtin la ngai em tin ei dawng ah, nang gen masan kati leh nang pawal zawk la hi ziakin gen masan ahun ti kit ah chu tia kakinawk tua tua lai un anun tawtna thu ngai ki un la Pathian thu ahi ziakin diktak in kiho un ahun tiphat in mihing lam kagel leh chu gen hak kasa ahin la Pathian thu ahi ziakin pawm mai ding in ka ngaitua hi ka ti leh, aman, la insungmi ten aho limpi nau leh ka hia abangtik lai ale zia gual thil te kiho kha lo thagau miten ahun puan ziang uh leh bang ngai dan la nei em ti henuam in ka hung

dawt ziang ahi nang in pawm mai di lati ahi leh kenle mihing thu sang ah Pathian thu chu pawm ding in thupuk na ka nei hi ati phat in kipak aum hi ti in chibai ka buk ah mangpha kithak in kakikhen tau. Zia zaw achun nu leh pa te kiang ah gen in tuleh be te tawh thingpi awm in a kuan ngal tau thingpi awm thu ahung git phat in nitak khat kanu suapi nu kanu neu in ei koah thilkhat kabwding ei gen piak ah zia chu nikhat lawmtang kuan nan ka hun tuak kha tau ah amute kiang in kei ei piau in tin kadawt leh ei piau ah ken le zia thil chu chawi in lawmtang mi 30 kikuan khawm thingtang buthe ka hiu ah buchi git hel pawl a khen gual pawl hampa chawm pawl te saklam deu achu ka lawi pani kadin pi ah kanu neu in ei gen thute chu zia gan hing kiang achun gen in chung lam ah kaphawk to leh sang deu in a lengto ah vachaten mat ahun guau ah khut kawi mut in vachate kahawk mang tau ah zia gan hing chun lawmtang kuante chung chu sangdeu in ahun vel ah vel thum tin nan ahung leng sung ah kimnu luchang n ahung chu ta zia ganhing chu (jawl jong) masanglai ah miten zi ding hawl na

ala mat sek uh ahi, zia thu chu ka nuneu in ahia phat in khat bawl di ei gen kit ah zia chu ala sak kawm ah l bil ah kiba ah chia di ala thu dawilo phungten ken lam bang in ei pel hen, ka dawiphungten dawnzak in chin in ei tuak hen ti ahia zia thil chu dawituak akitia zia chu le bawl in kachia ta malai miten agen nau achun l dawit te mi ahi lo leh agaucha bek uh kiki tuak sek ahi atiu ah zia chu bawl in kain a pat kasawm in lam ah kachia suk leh ama kimnu twh kaituak ua ziathu chu ka nuneu kiang ah ka gen leh labawl zosia ama chung ah tung ziang chu Pathian phasak hi nan ah adang bawl a ngai ta puai ei ti zaw achun. Kanuneu kadawt chian leh thagau mite thugen uh chu adik adiklo hiat na ding ah kabawl sak ahin adik ahi tiin kanute thugente nial in ei panphi phat in Kochuam dan thiangtho in 23rd Feb 1968 in kichenna ka nei tau. Hun chia zel in 1970-1971 in MDC election hun in Politics lam in ka lut ah Politics bawl hi Pathian mite a ding ahi puai ti kahiat dawna aum hi. Khenkhat chu dik tak ah Pathian hia le um maithei in au ahinlah ginchak dan a vang 100 lak ah 1 per-

cent, a um diam aw ti ah ngaitua nan ka gel sek ahi. Zia hun lai ah katuak khat chu kigenbe leh nikhat chu lawi te tawh nek leh dawn in khamkawm in zan sawt nungin in kazuan ah katun in kawt ala kikam ah ka nuu chu kako ah bang ding ah kawt lei kam khum ahem ti in kawt kasu a tawp in ei hung hawn ah kalut ah Bet ka gua lain lam in kichia in tiin kasawl leh aman ei dawnhu na achun nau in nawi a chep khawk lai taka hi ziak in kahun hawn vaklo ahi ahin kain lam ah chia ding ah leisawl vang chia puang ka a ziak chu lki chen nikhan Pathian leh mite hiat in thinan ei khen lo ngal khen puang ka ti ah kitiam ka hi ziak in nang bang gual la gel vang kahepuai kei chu kaki tiam na hemil in vang um puang ka ei ngaidam in tin ahung kapa, a kap ngam hi tin angei phe bet kagua akilap lai tak in kappa chu ahung thaw lam he kei lo in kakiang ah ahung ding ah pawsal hat la hi leh kei a beng in, kawt kam chu kamou ahipuai kei kam ahi ahun ti phat in thip bek in kalum ta kalwi nu le lupna chung in a nau pai kawm in pauchapna ahun nei ah, Lalpa damsung ah kakawppi ding ah

kabel kalawi pa hi alawi pawl ziak le hin tin, gochan ding ah lei piak chaten le a pau namsia a sa tau ah lungsiat tak in tukhel zia gual hinkhua mangkit talo ding in leh chaten le namsia a sak taklo dingun tuzan ahin alungthim in thu gen in ei siamphat piak in tiin mitthi luang zut zut ah ahung pauchapa, kangaitua na khat achun numei in zia gual ah pawsal pauchap piak ti in thodawk ah bet ding gua thawdaw ka guat leh kalungthim ah thu hung um chun “La thilbawl guat chu thilpha hi puai setan panmun pia kin ti aumphat in kathodawk ta pua kalupna a chun kingaitua nakhat ka nei ah kaisik ah kamitthi a luang luang ta mai ah. Zingkal khua ahung vak phat in katho dawak ah kaloinu chu kakaithe ah lungsiat in ei ngaidam in lachung ah thil bawl kaguat te hi kabawl khial tai tin ngaidam kadawt leh aman ei dawn huna achun thil bawl la guat te kha nang a pat ahi pua diabol nasep ahi ziak in ka ngaithiam hi tu khel vang zia gual thil phalo tea pat in kikawi kang tan a ti chun kathin lung sut gual in na ka sa kakap ta. KA nu pan un PAtian kiang ah ngaid-

am dawn in kakap gel tau. Zia ni kipat chun malai ah kipawl pi lawite kamu leh kaisel mang ah, hinkhua kasiang thak ta ka ngaitua in keia dingin Pathian ei guanpiak zipha tak nei in kaki san tai. Kanu ten ei phatsak pi nu chu le Kochuam dan thiangtho in pastor khat tawh akicheng ua hun chawm khat zo in a pawsal bial chuam ah posting ah aum kal in azi nu chu mikhat tawh kingai in thanguai tak in aum ah, akikhen ua ahin pastor pa chun ahung kipui kit ah akichen kit vang un kuaman miphan a mu diak ta puau.

Proverb 12:4 Numei pha chu a pawsal a ding in Lallukhuk ahin numei phalo in zachakna bawldawk tu vang natna leh agu hi muat tu ahi ati ahi. I holimnau ahin akilang ma m ahi. Ka ngaitua sek ah kanute dawisak na kha ala zawm leng kachanding kamu zia ahun nu leh pa dawisakna hi le a dik zozai pua Pathian dawisakna vang malzawl na ahi. Nikhat chu kalawinu chibai kabuk ah kakawi ah abiang kachawp leh nungak lai ah bawn zia gual hi bawl khalo ah kum 53 kikicheng ah teknung vuainung in biang chawp la bawl ziang ah

atia. Keiman gitlona taksa leh thagau thi theina mun ah ka um lai ah hinna lampi ei pui dawktu leh tual tha theina dinmun ah ka din lai ah le eihukdawktu leh ei zamdawktu pi, tual that-lo ah ei kawitu ka lungsiat ka ngaipen ka lawinu lahi zia kin labiang kachawp ahi tin nivei ka chawp ziang ahi.

Zia ban achun Mari leh Joseph le Pathian thupiak apawm zia kin un khawvel ah mihingte thina mun apat hinna lam ah hukdawktu tupa I Lalpau leh Hukdampa Jesu nu leh pa achang uh ahi. Ziazia kin achun, ei ma dawidan nu leh pa dawidan ahi zi pawsal nei sang in Pathian hiatpi phasak pi ah zi leh pawsal nei chu malzawl na ahi I tilo thei puai. Nu leh pa, Nungak tangval ten Pathian phasak pi cha leh mo pawsal pha, zipha, neithe chi at din Pathian in ei malzawl chiat ta hen.

HALLELUJAH AMEN

--o0o--

KEIMA LO CHU PATHIAN DANG NEI KIN:

-KL Muana Vaiphei

Ipu Mosi kianga Pathian in thusawm a piak te lak a pawimaw pen khat chu 'Keima lo chu Pathian dan neiki-un' ti hi a hi, a hin mihiam te a dinga Pathian chu a lamdang na leh a thik thu- siat dan amu thei a hi. Zia bep lo achun khawvel leh a sunga thil um zosia hi ama'n a siam ah, a dawu gual a um chiat dinga guat chuam leh athu zui lo ta phawt chu tawp tiang nei lo a gawt ding ihi dan uh ki chian tak ah ei zilti bep hi lo in zui chiat ding ua phutlui, pel thei him him ahi lo dan a namdet hi.

I Bible, a diak in Jeremiah zik a chun ka thupiak te leh Dan te laki hiatnawp bawl un Pathian dang la hawl un, lungil tak hilo in a min Mai in halmang thil lat, la bawl ua la ki thawi na teu le ka luak a suak in, ka za da mama hi ti'n a gen ah, zia zing lai a chun zawlnei lêm tamtak te le a um un Pathian thuthung thiangtho chu nasa tak in suk thanhuai in asubuak a um a, gawtna'n leh suak leh sal a tanna le tam tak a umngei a hi.

Abraham, Jacob, Isaac Pathian chu a Thiangtho in thikthu setak, thil thiang lo leh thildik lo him him ngaithei lo a hi, male a misiam ten Eden hivei nei in siam kawm Pathian tam tak mani phatlo na

leh tatna siat ziak in Pathian I siam kawm un, eiheputu eisiam tu kianga Kipak sang in lungkim-lo na le tatsiat na'n i mang zaw uh a hi. Ahi Pathian tilo kipakna bukim imu zo lo uh a hi, mihing khawvel hi mimal ngaidan in I pum buai ua, chantawk a lungawina mu lo in khawvel hawitak le bukim a siam buai na khawvel I chansak tak a zawk uh hi. Ei khristian kochuam sung bep hilo in, Pathian a umpuai ti Pawl tawh, Pathian tampi a hun leh amun zil a Pathian um a hi ti pawl kikal in khawvel hi buai nan a dim a, nung leh ma chawn thei lo in a amtha ziang ta hi.

Zia chu thukhat in um ta leh ei Khrista kochuam thiangtho kiti

te lâ ngei a hin le Pathian khat ging hingal a gindan, pawmdan, chiadan leh kisang bawl dan teu hi aki bang lo a tamtak ziak in kitaksan na, ki thulaklona a tam ah, Christa Pathian a hina hi khawvel hin a ki lang zo ta puan ginglo tute kianga chanchinpha ki tangko pi na ding a hi daltu liantak a hung hi tai.

Eima hi Pathian chenna in ihu chun khawvel pumpi hi Pathian chenna in hi ding a hi.zia ziak achun Pathian chate leh mithiangtho te hitak ziak in zia khawvel thim tak leh beidawng tak mai hi salvak in Pathian lèn tual chansak din taksa leh thagau in ki hepi in Zion la lem in lengkhawm tai tiu.

Lei leh van siamtu chate lenna Vangkhawpi hi diabol-zinglam chapa vaihawmna pel a van Angelvam te tawh lengkhawm in vanla hawitak tak lêm in Ama tawh zawna tangsam ta leu hing khawvel a kidona leh ki metmakna um ta lo di'n christian ten khawvel vaihawm tai tiu, 'Lalpa La gam hung tung ta hen'. Amen.

Zia a chung a te hi mamaw a hia, I sep bukim chun sauak leh sal,

gal, kido thuthang, natna lau um, gam kichu, thina, lusunna, kana, Liangvaina haw hi'n umta lo in nang leh kei ti um diak ta puan tin, In kuankhat gual in siamtu tawh limtawp um lo a hinkhua mat a hun tai, Tu leh tu zia hunbi chu siam leh tun sak ding in, khawvel hukdam pa chu I ngak ta hi.

Hallelui Halleluia Amen!

--o0o--

Presbytery sung thu chuam chuam – July 2022

1. Dt. 29th May 2022(Sunday) ni chun “Oneness/Unity” (Jn.17:21; Eph.4:3) ti thupi mang in Manipur Synod Unit visit programme chu Leilon P.C ah zingkal lam in ahung nei un, nitak lam in Kangvai P.C ah nei kit in lim leh kipak tak ah hun mat ahi.
2. Manipur Presbyterian Women Fellowship(MPWF) 19th Biennial Conf. chu 10th - 12th June 2022 sung in B. Phaicham P.C (EMP) ah “Therefore choose life” Deut.30:19 ti thupi mangin business session leh election te tawh thua in lawk tak in a mang zo tau. Chun, 2022-24 sunga MPWF puitu dingte:
 - (i) Chairperson :- Mrs. Rothangvungi (TP)
 - (ii) Vice Chairperson :- Mrs. Nemzalam (EMP)
 - (iii) Secretary :- Miss C. Hmangaihzuoli (TP)
 - (iv) Asst. Secretary :- Mrs. Deem Melody (KSP)
 - (v) Finance Secy. :- Mrs. Tingnu (KSP)
 - (vi) Treasurer :- Mrs. Laltanpuui (TP)
 PWF(KSP) apat MPWF dingte:-
 - (i) Mrs. C. Hoikim (Nghathal), (ii) Mrs. Kimvak (L. Mission Veng)
 - (iii) Mrs. Hoikim (L. Mission Veng), (iv) Mrs. Ngaineihat (Salem)
 - (v) Mrs. Niangkhonei (S. Kawtlian).
3. Rev. S.T. Kaia Vaiphei Administrative Secretary PCI in 1st June 2022 ni chun Office alua pan ngal hi. Lalpa’n ama pui zel ta hen.
4. The Good Shepherd Home a ding ah thilpiak chuam chuam ki dawng te February 2022 to June 2022:

Sl.No	Name	Address	Particular
1.	Saipum PWF	Saipum	Rice 108kg, Chini 2 kg
2.	Leisang PWF	Leisang	Rice 100kg
3.	Tuithanak District PWF	Tuithanak	₹ 3,000/-
4.	Pa Khamlal	Saipum	₹ 500/-
5.	Bright Future center & Manipur Times	Manipur	Ramen 8 box
6.	Salem PWF	Salem	Jumbo Box 1
7.	Mrs. Chinboi	Salem	₹ 500/-
8.	Leilon KKP	Leilon	T-Shirt 10pcs.
9.	Tangmual PWF	Tangmual	₹2,000/-
10.	Central Church PWF	Central	Meitei Dial 10pcs.
11.	Upa Lallianthang & Family	Salem	₹ 5,000/-

'DAMNA AW' PHUNGVUKTUTE :

PATRON MEMBERS :

- | | |
|-----------------------|-------------------------------|
| 1. Pu P. Vaiphei IAS, | Imphal |
| 2. Upa Henthianthang, | S.Kotlian |
| 3. T.Upa Haulallawm | S.Kotlian |
| 4. Upa Thienkhomang | S. Kotlian |
| 5. Upa Laltinkhup, | HQ. Church, Tuibuang |
| 6. Pi Manliankim, | HQ. Church, Tuibuang |
| 7. Upa D. Mina, | Lingsiphai |
| 8. T.Upa Ph. Gena, | Lingsiphai |
| 9. Pu. Khamlal | Saipum |
| 10. Pu Khamliankap | Saipum |
| 11. Pu. Tinlunlal | Saipum |
| 12, Pu. S.Kapbawi | New Delhi |
| 13. Upa Genhau | Central Church, Compound veng |
| 14. Pu. Khailianbawi | Central Church, Compound veng |
| 15. Pi Kimtawi | Kohima |
| 16. Tv. Daniel | Tangmual |

MEMORIAL GIFT :

- | | |
|--------------------------------|--|
| 1. Pi Deem Melody, | Central Church, (Rengkai)
<i>[In loving memory of (L) Upa Lamthianlal]</i> |
| 2. Pi Rebekah | Kangvai
<i>[In loving memory of (L) Pastor Khaivung]</i> |
| 3. Upa Liansawmthang | Lingsiphai
<i>[In loving memory of (L) Pu. Henzagen]</i> |
| 4. Pi. Nem Grace Boisi Capvung | Delhi
<i>[In loving memory of (L) Pi Vanlalchhuangi]</i> |

SUPPORTING MEMBERS :

- | | |
|---------------------------|-----------------|
| 1. Upa Khomlunlal | S.Kotlian, |
| 2. Pu. S.Thangminlian | Lingsiphai, |
| 3. Pu Lelboi, | Lingsiphai |
| 4. T.Upa Lalneilian | Central Church, |
| 5. Pu EL Soson | Central Church |
| 6. T.Upa Genminthang, | Central Church, |
| 7. Pi. Kimneihawi | Saipum |
| 8. T.Upa J. Mark | Saipum |
| 9. Pu Genthiankap, | Nghathal |
| 10. Pu Lianzakhup | Nghathal. |
| 11. Pu Lemthang | L. Mission Veng |
| 12. Rev. S.T.Kaia Vaiphei | Nghathal |
| 13. Nk. Dimkhoniang | Zikpi Tampak |

ENCOURAGING MEMBERS :

- | | |
|-------------------|-----------------|
| 1. Pu K. Minlian | Tangmual, |
| 2. Upa Ph. Kamlam | L. Champhai, |
| 3. Upa S.T.Siam, | L. Mission Veng |
| 4. Pi Chhungi | Hq. Tuibuang |
| 5. Pu S. Paumuan | Saipum |
| 6. Upa Tongneilal | Leilon |

Damna Aw monthly magazine hi tutiang ahin kochuamte'n phungvukna i bawlte'u ziaka hin chiazal i hiu a, kuale phungvukna bawl utte a ding in bangtik lai in le bawlthei zing ahi.

(i). Patron member- Kum 3 (three) a ding in. ₹. 3,000/-

(ii). Memorial Gift- Kum 2(two) a ding in. ₹. 2,500/-

(iii). Supporting member- Kum2(two) a ding in ₹. 2,000/-

(iv). Encourager- Kum 1(one) a ding in. ₹. 1,000/-

Chun, sum thawt nuamte a ding in:

A/C name: Khuga Sadar Presbytery(MPCS)

A/C nos: 32483318505

Branch code: 6182, CCpur

CIF nos: 86412486695

IFSC nos: SBINOOO6182.

--o0o--